

# BATAKURU PUULUSA HAA E FILIMUUNU

**1** <sup>1</sup> Immorde e an min Puulusa, oo kasoojo sabu Iisaa Almasiihu on, wondude e Timotee oo musiddo men, haa e oo gido amen, wondiddo amen e golle, dun ko an Filimuunu, <sup>2</sup> wondude e Apifiyyata oo bandiraawo amen e Arkiipe oo wondiddo amen e tippiro e haa e \*moftal wongal ngal ka suudu maa an Filimuunu.

<sup>3</sup> Yo moyyere e buttu wonan on, immorde e Alla Baaba men, e Iisaa Almasiihu Joomi on.

## Fii no Puulusa Weltorani Alla fii Filimuunu

<sup>4</sup> Mido duumii e jarnugol Alla an on e nder ko mi maandini fii maa e nder torndeeki an din, <sup>5</sup> ko fii mido nanude no wowlee fii ko gomdindaa Iisaa Joomi on kon, e giggol ngol yidudaa yimbe Alla ben fow ngol kadi. <sup>6</sup> Mi torike yo gomdinal maa ngal hawtuden ngal wadu batte, andaa moyyere wonannde en e nder humondiral e \*Almasiihu on. <sup>7</sup> E hoore dun mi hebii weltaare e wakkilaare buy sabu giggol maa ngol, ko fii ko sabu maa yo musiddo, berde yimbe Alla ben guttiniraa.

## Fii no Puulusa Fattorani Onesiima ka Filimuunu

<sup>8</sup> Ko dun wadi, fii kala mido mari hoolaare mawnde sabu Almasiihu on fii windangol ma ko haanudaa wadude kon, <sup>9</sup> mido yidu-maa tororde giggol, wano min Puulusa mi woniri nii nayeejo e kasoojo kadi sabu Iisaa Almasiihu on. <sup>10</sup> Mi jeejii ma fii Onesiima, on wontudo biddo an ka gomdinal fewndo mi jolkaa. <sup>11</sup> Hari o wonanii ma meere, kono jooni o nafete wano o nafirimmi non.<sup>a</sup>

<sup>12</sup> Awa mi neltii mo e maa, on mo tawata ko bernde an min tigi. <sup>13</sup> Mi faalano yo o wonu takko an, fii yo o wallan lonto-maa e nder ko mi jolkaa fii Kibaaru Moyyo

---

<sup>a</sup>1.11 «Onesiima» ko firi ko «nafa».

on kon.<sup>14</sup> Kono hay fus mi faalaaka wadude e 6aawo fewjoore maa nden, fii wota kuude maa moyye den wonu karhaade, kono de wona anniyaade.<sup>15</sup> No gasa a seeduno e Onesiima haa seeda, fii yo a hettitu mo haa poomaa.<sup>16</sup> Hara hinaa wa maccudo hande kadi, kono no buriri maccudo, wa musiddo yidaado, tentinii telen-ma an min, ittii e sikke telen-ma maa, bay ko o maccudo, awa kadi ko o musiddo gomdindo Joomi on.

<sup>17</sup> Si tawii hida jogori lan wa gollideteedo, haray jabir mo wa an min. <sup>18</sup> Si himo bonnu-maa, maa si himo jogani-maa godsun, fawu dun e hoore an. <sup>19</sup> Ko jungo an ngon tigi, min Puulusa mi windiri nduu batakuru, mi yobitoyte dun, fii kala mi faalaaka wi'ude an tigi hida joganii mi godsun, dun ko ngurndan maa dan. <sup>20</sup> Awa yo musiddo, wadanan dun sabu Joomiraado on, buttinaa bernde an nden e telen-ma Almasiihu on.

<sup>21</sup> Ko e nder hoolorgol doftaare maa nden mi windiri, e hoore andugol a waday buri ko mi wi'i kon. <sup>22</sup> E hoore dun, ebbanan werde, mido tanyinii yahugol ka mon sabu torndeeji mon din.

<sup>23</sup> Epafaraasi oo mo mi sokidaa ka kasoo sabu Iisaa Almasiihu on, salminii ma,  
<sup>24</sup> wondude e Markuusa e Aristarke e Demaasi e Luuka, dun ko ben wondibbe an e golle.

<sup>25</sup> Yo moyyere Iisaa Almasiihu Joomi men on wonu e berde mon.

---

ÉPÎTRE DE PAUL À PHILÉMON

en Langue Pular (Fouta-Jalon)

*République de Guinée*

© 2013 Traducteurs Pionniers de la Bible

en collaboration avec

Mission Protestante Réformée